

दिनांक 08.10.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेंद्र मोदी कह्यो-देश मांय नौजवानां सारु मोकळा मौका मौजूद।
- मुख्यमंत्री भजनलाल शर्मा प्रवासी राजस्थानियां ऊं 'विकसित राजस्थान 2047' बणावण मांय सक्रिय भागीदारी निभावण सारु कह्यो।
- देश मांय सामाजिक सुरक्षा रो दायरो बध र 64 फीसदी व्हयो।

राजस्थान स्टेट गैस लिमिटेड कोटा मांय नुवो सी.एन.जी. टेशन खोलेला।

000

प्रधानमंत्री नरेंद्र मोदी कह्यो है के देश मांय नौजवानां सारु मोकळा मौका मौजूद है। वे आज नवी मुंबई मांय नुवा अंतर्राष्ट्रीय हवाई अड्डा ने जनता ने संपण रे मौके राखी ज्या कार्यक्रम मांय बोल रह्या हा। श्री मोदी कह्यो के केन्द्र सरकार नौजवानां ने आगे बधावण सारु हाल ई मांय पीएम सेतु योजना रो ऐलाण कीनो हो, जिण ऊं देशभर रा आईटीआई संस्थान जुड़ जावेला। वे कह्यो के मुंबई मांय नुवो हवाई अड्डो बणबा ऊं सगळा तबकां ने फायदो व्हेला।

000

मुख्यमंत्री भजनलाल शर्मा प्रवासी राजस्थानियां ऊं 'विकसित राजस्थान 2047' बणावण मांय सक्रिय भागीदारी निभावण बाबत कह्यो है। वे आज गुजरात रा सूरत मांय 'प्रवासी राजस्थानी सम्मेलन' मांय बोल रह्या हा। मुख्यमंत्री कह्यो के गुजरात अर राजस्थान मिल र मजबूत औद्योगिक कॉरिडोर बणा रह्या है अर दोन्यू राज्यां ने मिल र राजस्थान ने दुनिया री हीरा-पन्ना अर गहणा री खास ठोड़ बणावणो चाहिजे। श्री शर्मा कह्यो के राजस्थान सरकार हर साल 'प्रवासी राजस्थानी सम्मान पुरस्कार' देवेला। वे प्रवासियां ने 10 दिसंबर ने जयपुर मांय व्हेवण वाळा प्रवासी राजस्थानी दिवस समारोह मांय शामिल व्हेवण रो न्यौतो दीनो। श्री शर्मा बतायो के 35 लाख करोड़ रुपया रा करार मांय ऊं 7 लाख करोड़ रुपया रा काम सरु व्हे गया है। वे कह्यो के रिप्स-2024 रा तैत निवेशकां ने 1 हजार 400 करोड़ रुपया ऊं बत्ती रकम री छूट दीरीजी। श्री शर्मा आईटी, दवाइयां अर कपड़ा सरीखा हलकां मांय निवेश सारु कारोबारियां ने न्यौतो दीनो।

000

कौशल विकास अर उद्यमिता राज्य मंत्री जयंत चौधरी कह्यो है के आर्टिफिशियल इंटेलिजेंस केवल इंजीनियरां ताई सीमित नी है, बल्कि वां सगळा सारु काम री चीज है जो उत्पादकता बधावण अर काम-कमाई मांय सुधार सारु तकनीक काम लेवण री मंशा राखे है। श्री चौधरी आज नई दिल्ली मांय राखी ज्या एक कार्यक्रम मांय बोल रह्या हा।

ई मौके नीति आयोग रा सी.ई.ओ. बी.वी.आर. सुब्रह्मण्यम कह्यो के भारत ने तकनीकी बदलावां री बेगी पिछाण करता थकां आर्टिफिशियल इंटेलिजेंस, जैव प्रौद्योगिकी अर क्वांटम प्रौद्योगिकी सरीखा नुवा हलकां मांय दुनिया री अगुवाई करणी चाहिजे।

000

बारबाडोस री राजधानी ब्रिजटाउन मांय आज न्यारा-न्यारा देशां रा विधान मंडलां रा अध्यक्षां रा राष्ट्रमंडल संसदीय संघ रो 68वां सम्मेलन सुरू व्ह्यो। इण मांय लोकसभा अध्यक्ष ओम बिरला ई शामिल व्हे रह्या है। सम्मेलन रो मुद्दो **‘कॉमनवेल्थ: एक वैश्विक साझेदार’** है, जठे बातचीत रे जरिये लगातार विकास रा बारा मांय चर्चा करी जा रही है। विधानसभा अध्यक्ष वासुदेव देवनानी इण ने सीख देवण वाळो बतायो है।

000

झुंझुनू जिला रा मेहरादासी गांव रा शहीद सार्जेंट सुरेंद्र मोगा ने देश री हिफाजत करता थकां जान निछावर कर देवण सारू वायु सेना मेडल ऊं नवाजी ज्यो है। आज 93वां वायु सेना दिवस रे मौके गाजियाबाद रा हिंडन एयरबेस माथे राख्यी ज्यो कार्यक्रम मांय वायु सेना प्रमुख एयर चीफ मार्शल अमरप्रीत सिंह शहीद मोगा री वीरांगना सीमा मोगा ने वां रो तमगो सूप्यो। सुरेंद्र मोगा ऑपरेशन सिंदूर रे दौरान असाधारण हिम्मत रो दरसाव करता थकां प्राण निछावर कर दीना है।

000

भारत ने अंतर्राष्ट्रीय सामाजिक सुरक्षा संघ री ओर ऊं **सामाजिक सुरक्षा में उत्कृष्ट उपलब्धि पुरस्कार 2025** ऊं नवाजी ज्यो है। श्रम अर रोजगार मंत्री मनसुख मांडविया आज नई दिल्ली मांय खबरनवीसां ने आ जाणकारी दीनी। वे कह्यो के प्रधानमंत्री मोदी री अगुवाई मांय देश रो सामाजिक सुरक्षा रो दायरो बध र 64 फीसदी व्हे ग्यो है।

000

केंद्रीय संचार ब्यूरो री ओर ऊं सवाईमाधोपुर जिला रा कुतलपुरा जाटान मांय जीएसटी बचत उत्सव अर पोषण महीना रा बारा मांय जाग जगावण सारू खास कार्यक्रम राख्यी ज्यो। ई दौरान विद्यार्थियां अर जनता ने जाणकारी देवण सारू जागरुकता रैली, संगोष्ठी, प्रदर्शनी, चित्रकला, पोस्टर होड़ अर सवाल-जवाब री होड़ राख्यी ज्यी। ब्यूरो रा प्रभारी नेमीचंद मीणा केंद्र सरकार कानी ऊं चलायी जा रही जनता रा भला री योजनावां री जाणकारी दीनी। कार्यक्रम रे दौरान आंगनबाड़ी कार्यकर्तावां री ओर ऊं पौष्टिक आहार प्रदर्शनी लगायी ज्यी। जोधपुर मांय ई केंद्रीय संचार ब्यूरो री ओर ऊं पीपाड़ री सरकारी स्कूल मांय **स्वस्थ नारी-सशक्त परिवार** अर जीएसटी बचत उत्सव रा बारा मांय जाणकारी देवण रो कार्यक्रम राख्यी ज्यो।

000

भरतपुर रा केवलादेव राष्ट्रीय पक्षी उद्यान मांय आवता महीना ऊं नाव ऊं सफारी सुरू करी जावेला। नाव सफारी रे जरिये सैलानी प्रवासी परिन्दां ने कुदरती वातावरण मांय करीब ऊं देख सकेला। उद्यान रा निदेशक मानस सिंह बतायो के नाव सफारी ऊं जुड़्या जरूरी काम पूरा कर लिया ज्यो है।

000

वरिष्ठ नागरिक तीर्थ यात्रा योजना रा तैत आज हनुमानगढ़ ऊं रामेश्वरम्-मदुरई सारू खास रेलगाड़ी रवाना व्ही। विधायक संजीव बेनीवाल अर अतिरिक्त जिला कलेक्टर उम्मेदीलाल मीणा इण ने हरी झंडी बता र रवाना कीनी। देवस्थान महकमा रा सहायक आयुक्त ओमप्रकाश बतायो के ई गाड़ी मांय हनुमानगढ़ ऊं साढे तीन सौ अर सूरतगढ़ ऊं 326 मुसाफिर तीरथ करण सारू गया है।

एस.बी. ओम प्रकाश

000

राजस्थान स्टेट गैस लिमिटेड कोटा, ग्वालियर अर श्योपुर मांय नुवा सी.एन.जी. टेशन खोलेला। आर. एस.जी.एल. रा चेयरमैन टी. रविकान्त आज बोर्ड री मीटिंग मांय आ जाणकारी दीनी। वे बतायो के बत्ता ऊं बत्ता पिरवारां ताई पाइप लेण रे ज़रिए रसोई गैस पूगावण री कोशिश करी जावेला। श्री रविकांत बतायो के कंपनी अब एल.एन.जी. लिक्विफाइड नैचुरल गैस सेवा ने ई बधावेला।

000

रेलवे रा **‘स्पेशल कैपेन 5.0’** रा तैत अजमेर रेलवे टेशन माथे **‘अमृत संवाद’** कार्यक्रम राख्यी ज्यो। ई दौरान, मंडल रेल प्रबंधक राजू भूतड़ा अर दूजा अहलकार मुसाफिरां ऊं बातचीत कर र वां री समस्यावां, सुझाव अर अनुभव री जाणकारी लीनी। जोधपुर रेल मंडल री ओर ऊं ई स्वच्छता पखवाड़ा रा तैत स्वच्छ परिसर दिवस मनायी ज्यो।

000

71वों वन्यजीव सप्ताह आज पूरो व्हे ग्यो। ई मौके न्यारा-न्यारा ज़िला मांय खास कार्यक्रम राख्यी ज्या। पाली जिला रा देसूरी उपखंड मांय अरावली हलका रे आरे-सारे रेहवण वाळा लोगां मांय जंगली जिनावरां ने बचावण रा बारा मांय जाग जगावण रा मकसद ऊं आज जागरुकता रैली निकाळी ज्यी। ई मौके विद्यार्थियां सारू जंगली जिनावरां ने बचावण अर वां रा बारा मांय जाणकारी ऊं जुड़ी निबंध लिखण अर सवाल-जवाब री होड़ां राख्यी ज्यी। सवाईमाधोपुर ज़िला मांय वन्यजीव सप्ताह रा तैत जंगलात महकमा री ओर ऊं राख्यी ज्यी न्यारी-न्यारी होड़ां जीतण वाळां ने ईनाम दिया ज्या।

000

बाड़मेर मांय आज थार महोत्सव सुरू व्ह्यो। ई मौके ज़िला कलेक्टर टीना डाबी गांधी चौक ऊं शोभायात्रा ने हरी झंडी बता र रवाना कीनी। म्हाणा खबरनवीस बतायो के महोत्सव रा तैत 'रंग रेगिस्तान के' मुद्दा माथे न्यारा-न्यारा सांस्कृतिक कार्यक्रम पेश कर्या जावेला।

000